

I. KAFLI
**Tillögur að breytingum á lögum nr. 60/2013 um náttúruvernd, með síðari
breytingum.**

1. gr.

Eftirfarandi breytingar verða á 63. gr. laganna:

- a. 1. mgr. 63. gr. orðast svo: Óheimilt er að flytja inn og dreifa lifandi framandi lífverum nema með leyfi Umhverfisstofnunar. Til innflutnings lifandi dýra eða plantna skal jafnframt afla leyfis Matvælastofnunar í samræmi við lög nr. 54/1990 um innflutning dýra eða lög nr. 25/1993 um dýrasjúkdóma og varnir gegn þeim.
- b. Á eftir 1. mgr. kemur ný málsgrein, 2. mgr., svohljóðandi:
Þrátt fyrir ákvæði 1. mgr. er heimilt að flytja eftirfarandi inn án leyfis Umhverfisstofnunar:
 - a. búfé, en um slíkan innflutning gilda ákvæði laga nr. 54/1990 um innflutning dýra,
 - b. framandi plöntutegundir sem hafa verið notaðar til garðyrkju, túnræktar, jarðræktar, landgræðslu og skógræktar nema innflutningur sé bannaður samkvæmt reglugerð, sbr. 6. mgr. þessarar greinar og 2. gr. laga nr. 51/1981 um varnir gegn sjúkdómum og meindýrum á plöntum.
 - c. tegundir sem ráðherra hefur ákveðið með reglugerð sbr. 5. mgr. að flytja megi inn án leyfis.
- c. 3. mgr. 63. gr. verður svohljóðandi
Með umsókn um leyfi skv. 1. mgr. skal fylgja áhættumat sem umsækjandi hefur aflað hjá óháðum aðila og skal þar m.a. koma fram mat á hættu á því hvort viðkomandi lífverur séu ágengar og þeim áhrifum sem það kann að hafa á líffræðilega fjölbreytni. Umsókninni skal einnig fylgja greinargerð um þau áhrif sem gera má ráð fyrir að dreifingin eða möguleg útbreiðsla hennar hafi á lífríkið og líffræðilega fjölbreytni. Ráðherra setur í reglugerð nánari fyrirmæli um umsóknir og fylgigögn með umsóknum sbr. 5. mgr.

2. gr.

Á eftir 63. gr. laganna kemur ný grein, 63. gr. a, ásamt fyrirsögn, svohljóðandi:

Móttaka og afgreiðsla umsókna

Afhenda skal Matvælastofnun umsóknir um leyfi skv. 63. gr. 1. mgr. ásamt áhættumati og greinargerð skv. 3. mgr. Matvælastofnun skal framsenda allar umsóknir um innflutningsleyfi fyrir framandi lífverur ásamt fylgigögnum til Umhverfisstofnunar til meðferðar samkvæmt lögum þessum. Umhverfisstofnun metur hvort umsókn um innflutningsleyfi falli undir lög þessi.

Umsókn um leyfi fyrir innflutningi framandi lífveru skal afgreidd samhliða umsókn til Matvælastofnunar um leyfi til innflutnings á grundvelli laga nr. 54/1990 um innflutning dýra eða laga nr. 25/1993 um dýrasjúkdóma og varnir gegn þeim. Hvor stofnun fyrir sig skal tilkynna umsækjanda hvort umsókn teljist fullnægjandi innan mánaðar frá því að umsóknin berst stofnuninni. Verði tafir á málsmeðferð vegna ófullnægjandi gagna umsækjanda framlengist frestur til afgreiðslu sem því nemur. Þegar Matvælastofnun og Umhverfisstofnun hafa lokið vinnslu umsóknar skal tilkynna umsækjanda niðurstöður beggja stofnana.